

**SKUPŠTINA KANTONA SARAJEVO**

**ZAPISNIK SA  
19. RADNE SJEDNICE SKUPŠTINE KANTONA SARAJEVO,  
ODRŽANE 07.09.2016. GODINE SA POČETKOM RADA U 10,00 SATI**

**Sarajevo, septembar 2016.**

**Sjednici su prisustvovali poslanici/zastupnici:**

**STRANKA DEMOKRATSKE AKCIJE**

1. Ademović Kemal
2. Čelik Mirza
3. Čomor Eldar
4. Dovadžija Amar
5. Kozadra Muhamed
6. Mašović Amor
7. Okerić Elmedin

**DEMOKRATSKA FRONTA – ŽELJKO KOMŠIĆ**

1. Akšamija Goran
2. Bukva Sejo
3. Kerla Bibija
4. Mehmedagić Mersiha
5. Pindžo Mirsad

**SAVEZ ZA BOLJU BUDUĆNOST – FAHRUDIN RADONČIĆ**

1. Babić Ana
2. Bajrović Izudin
3. Lakota Rasim
4. Marić Zvonko
5. Rađo Dževad

**SOCIJALDEMOKRATSKA PARTIJA BOSNE I HERCEGOVINE**

1. Segmedina Bajramović Srna

**NAŠA STRANKA**

1. Forto Edin
2. Kojović Predrag

**BOSANSKA STRANKA – MIRNES AJANOVIĆ**

1. Pleho Haris
2. Rasim Smajić

**BOSANSKOHERCEGOVAČKA PATRIOTSKA STRANKA – SEFER HALILOVIĆ**

**SAMOSTALNI POSLANICI/ZASTUPNICI**

1. Bjelak Nermin
2. Aljović Hamed
3. Mekić Amel
4. Pecikoza Fahrudin

## **TOK SJEDNICE**

19. Radnu sjednicu Skupštine Kantona Sarajevo otvorila je predsjedateljica Ana Babić (u daljem tekstu Predsjedateljica) dana 07. septembra 2016.godine u 10,00 sati.

Prema evidenciji Službe sjednici je na otvaranju prisustvovalo 30 zastupnika, što je dovoljan broj za punovažan rad i odlučivanje, a svoj izostanak pravdali su zastupnici: Slaviša Šućur, Sabahudin Delalić, Selma Filipović i Fikret Prevljak, dok je opravdano kašnjenje najavio zastupnik Fahrudin Pecikoza.

Predsjedateljica je poželila sreću na Paraolimpijskim igrama u Rio de Ženeiru Reprezentaciji u sjedećoj odbojci BiH.

## **UTVRĐIVANJE DNEVNOG REDA**

Prijedlog dnevnog reda 19. Radne sjednice skupštine Kantona Sarajevo utvrdio je Kolegij koji je održan dana 25.08.2016. godine.

Na osnovu člana 73. Poslovnika Skupštine Kantona Kolegij je prihvatio da se dnevni red za 19. Radnu sjednicu dopuni sljedećim tačkama:

1. Prijedlog odluke o davanju ovlaštenja za obavljanje funkcije Sekretara Skupštine Kantona Sarajevo; (razmatraće se kao 5. tačka)
2. Prijedlog Odluke o davanju saglasnosti Kantonalnom javnom komunalnom preduzeću "Vodovod i kanalizacija" d.o.o. Sarajevo za potpisivanje Sporazuma o realizaciji projekta uređenja lokaliteta rezervoara "Soukbunar" sa Općinom Centar Sarajevo (razmatraće se kao 9. tačka)
3. Prijedlog odluke o izmjeni naziva JU OŠ "Dobroševići" Sarajevo u novi naziv JU OŠ "Mustafa Busuladžić" Sarajevo (razmatraće se kao 10. tačka)
4. Prijedlog odluke o izmjeni broja adrese osnovne škole na području Općine Ilidža "MZ Osjek"; (razmatraće se kao 11. tačka)
5. Izvještaj Ekspertne komisije Ministarstva za obrazovanje, nauku i mlade Kantona Sarajevo za davanje stručnog/ekspertnog mišljenja o opravdanosti osnivanja Odsjeka za edukaciju i rehabilitaciju na Pedagoškom fakultetu Univerziteta u Sarajevu (razmatraće se kao 17. tačka)

**SKUPŠTINA JE ZA 19. RADNU SJEDNICU SKUPŠTINE KANTONA SARAJEVO JEDNOGLASNO ( 29 „ZA“) USVOJILA SLJEDEĆI DNEVNI RED:**

1. Poslanička/zastupnička pitanja, inicijative i odgovori;
2. Prijedlog zakona o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice s djecom;
3. Prijedlog Strategije razvoja Kantona Sarajevo do 2020.;
4. Prijedlog odluke o izmjenama Odluke o provođenju Prostornog plana posebnog područja prirodnog naslijeđa "Vodopad Skakavac"-skraćeni postupak;
5. Prijedlog odluke o davanju ovlaštenja za obavljanje funkcije Sekretara Skupštine Kantona Sarajevo;
6. Prijedlog Odluke o utvrđivanju postojanja javnog interesa za osnivanje Javne ustanove Osnovna škola "ŠIP" Sarajevo;
7. Prijedlog odluke o osnivanju Turističke zajednice Kantona Sarajevo;
8. Prijedlog odluke o davanju saglasnosti na Nacrt sporazuma o regulisanju međusobnih prava i obaveza između Kantona Sarajevo-Ministarstvo saobraćaja i Općine Novo Sarajevo na zajedničkoj izgradnji podzemne garaže G3 u ulici Kolodvorska u Sarajevu;
9. Prijedlog Odluke o davanju saglasnosti Kantonalnom javnom komunalnom preduzeću "Vodovod i kanalizacija" d.o.o. Sarajevo za potpisivanje Sporazuma o realizaciji projekta uređenja lokaliteta rezervoara "Soukbunar" sa Općinom Centar Sarajevo;
10. Prijedlog odluke o izmjeni naziva JU OŠ "Dobroševići" Sarajevo u novi naziv JU OŠ "Mustafa Busuladžić" Sarajevo;
11. Prijedlog odluke o izmjeni broja adrese osnovne škole na području Općine Ilidža "MZ Osjek;
12. Prijedlog odluke o usklađivanju statusa:
  - a) Kantonalnog javnog preduzeća "Veterinarska stanica" d.o.o. Sarajevo;
  - b) Kantonalnog javnog preduzeća za gospodarenje državnim šumama "Sarajevo – šume" d.o.o. Sarajevo;
  - c) Kantonalnog javnog preduzeća "Poljoprivredno dobro Butmir" d.o.o. Sarajevo;
  - d) Kantonalnog javnog preduzeća Centar "Skenderija" d.o.o. Sarajevo;
  - e) Kantonalnog javnog preduzeća "ZOI 84" OCS d.o.o. Sarajevo;
13. Prijedlog odluke o prihvatanju Informacije Ministarstva za obrazovanje, nauku i mlade Kantona Sarajevo o finansijskom poslovanju javnih ustanova iz oblasti predškolskog, osnovnog, srednjeg i visokog obrazovanja i nauke za 2015. godinu (zbirno).
14. Prijedlog odluke o dopuni odluke o imenovanju članova Vijeća nacionalnih manjina Kantona Sarajevo;
15. Izvještaj o radu i finansijskom poslovanju Zavoda za izgradnju Kantona Sarajevo, za 2015. godinu;
16. Izvještaj o poslovanju KJKP "GRAS" d.o.o. Sarajevo za 2015. godinu;
17. Izvještaj Ekspertne komisije Ministarstva za obrazovanje, nauku i mlade Kantona Sarajevo za davanje stručnog/ekspertnog mišljenja o opravdanosti osnivanja Odsjeka za edukaciju i rehabilitaciju na Pedagoškom fakultetu Univerziteta u Sarajevu
18. Informacija o stepenu realizacije skupštinskih zaključaka za čiju je realizaciju zadužena Vlada Kantona Sarajevo.

**Premijer Elmedin Konaković** je u ime Vlade Kantona Sarajevo povukao dvije tačke dnevnog reda, i to:

12. Prijedlog odluke o usklađivanju statusa:
  - a) Kantonalnog javnog preduzeća "Veterinarska stanica" d.o.o. Sarajevo;
  - b) Kantonalnog javnog preduzeća za gospodarenje državnim šumama "Sarajevo – šume" d.o.o. Sarajevo;

- c) Kantonalnog javnog preduzeća "Poljoprivredno dobro Butmir" d.o.o. Sarajevo;
- d) Kantonalnog javnog preduzeća Centar "Skenderija" d.o.o. Sarajevo;
- e) Kantonalnog javnog preduzeća "ZOI 84" OCS d.o.o. Sarajevo

16. Izvještaj o poslovanju KJKP "GRAS" d.o.o. Sarajevo za 2015. godinu.

**Predsjedateljica** je navela da je zastupnicima dostavljen sljedeći informativni materijal:

- Informacija o stanju kriminaliteta, javnog reda i mira i sigurnosti saobraćaja na poručju Kantona Sarajevo za period januar - juni 2016.godine;
- Informacija o stanju kriminaliteta, javnog reda i mira i sigurnosti saobraćaja na poručju Kantona Sarajevo za mjesec juni 2016.godine;
- Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za period juli 2016. godine

U nastavku, predsjedateljica je pozvala zastupnike da razmatraju i izjasne se o zapisnicima sa prethodnih sjednica. Kako nije bilo primjedbi na zapisnike, niti diskusija, prešlo se na izjašnjavanje.

**Skupština potvrdila Zapisnik sa 17. Radne sjednice Skupštine Kantona Sarajevo održane 28.06.2016.godine, jednoglasno.**

**Skupština je potvrdila Zapisnik sa 18. Radne sjednice Skupštine Kantona Sarajevo održane 27.07. 2016.godine, jednoglasno.**

U 10,32 sati se prešlo na realizaciju prve tačke dnevnog reda.

**AD – 1.**

## **POSLANIČKA/ ZASTUPNIČKA PITANJA I INICIJATIVE**

Predsjedateljica je pozvala zastupnike da podnesu svoja zastupnička pitanja i inicijative po abecednom redu, koje prenosimo u cjelosti (citiramo).

**Zastupnik Akšamija Goran je podnio jednu zastupničku inicijativu:**

„ Ja se obraćam sa inicijativom, odnosno upućujem jednu da kažem ovako kritiku Vladi, do kada će učestvovati u teroru koji sprovode kantonalna javna preduzeća nad građanima Sarajeva i drugih područja? Svjesni smo svega šta se događa sa vodovodom, Grasom, gdje smo izloženi stalnom maltretiranju i sada najnoviji primjer svega šta se dešava, to je znači Sjednica Vlade Kantona od 15.08.2016. kada se usvaja novi tarifni sistem za isporuku toplotne energije. Određen je novi način obračuna i naplate utrošene toplotne energije za korisnike stambeno-poslovnih prostora, u objektima bez mjerenja kojim će korisnici plaćati niže iznose tokom ljetnih mjeseci, od maja do septembra, a u period grijanja tokom zimskih mjeseci veće iznose. Kao razlika u odnosu na prethodni tarifni system navodi se da se sedam mjeseci fakturiše energetski dio, a ostali troškovi kroz dvanaest mjeseci. Koji su to troškovi i zašto se fakturišu u period kada se onda energija ne isporučuje? Dostavljena je brošura koja ukazuje da neće biti nikakve razlike u cijeni, međutim sa jednom zdravom analizom sasvim je jasno da smo već oštećeni u toku ove godine, jer smo do sada u ovom nižem tarifnom sistemu plaćali tri mjeseca, znači po starom, tako da će taj iznos ostati čista dobit bez ikakvog utroška za ovo kantonalno javno preduzeće. Na ovaj način objašnjava se da će se povećati likvidnost

Toplana u grejnoj sezoni, ali Vlada nije uzela u obzir da će pogoršati likvidnost građana povećavajući im udar na kućni budžet u zimskim mjesecima. Toplane kažu da su realizovale projekte ugradnje kumulativnih mjerila energije na ulazima svih objekata, što ja kažem da nije tačno i da se može mjeriti ukupna potrošnja energije za svaki ulaz. Zato što je takav tarifni sistem obračuna i naplate troškova centralnog grijanja, na osnovu izmjerene potrošnje na kumulativnim mjerilima i učešća pojedinog stana, poslovnog prostora, primjenjivati tek od 01.01.2020. Ova štednja će se izgleda isplatiti samo Vladi i Toplanama jer građani neće još dugo plaćati ono što zaista potroše. Zakon o zaštiti potrošača u članu 35 kaže:

Stav I „Prodaja energije, vode, električne energije, energije za grijanje, treba da bude obračunata na osnovu stvarnih isporuka očitanih na brojilu potrošača.“

Satv III kaže: „Organi nadležni za energetiku i ovlaštena lica za vodoprivredu sporazumno sa ovlaštenim licem iz nadležnog instituta u BIH propisat će način mjerenja stvarno isporučene energije, odnosno vode“, što se naravno i ne čini. Na osnovu ovog člana zakona može se reći da su korisnici Toplana u neravnopravnom položaju u odnosu na korisnike Sarajevo Gasa i Vodovoda jer im se potrošnja energije ne obračunava na osnovu stvarnih isporuka očitanih na brojilu. Ovu privilegiju imaju samo vlasnici stanova uglavnom u novogradnji koji imaju ugrađene kalorimetre. Međutim i ovi su potrošači su najnovijom odlukom ugroženi sa zahtjevima za baždarenja mjerila u nerealno kratkom roku. Ima mnogo primjera gdje se navodi gdje su ugovori potpisani prije tri godine, a sada se traži baždarenje mjerila za koje je zakonski rok ustvari pet godina. Navodno sve ove troškove snose korisnici usluga Toplana Sarajevo što je isto također nerealno i pored zakona o mjeriteljstvu koji to propisuje i ako već postoji tekuće održavanje onda bi ono trebalo podrazumijevati i servisiranje ovih kalorimetara, a da ostale obaveze preuzima onaj korisnik tog grijanja, odnosno vlasnik stana. Također, sada se zahtjeva dosta nerealno plaćanje za baždarenje tih mjerila, odnosno kalorimetara što mnoge porodice ne mogu podnijeti i to faktički vrši se jedna ucjena gdje se mora potpisati novi ugovor u roku od dveste dana, gdje opet ljudi sa potpisanim ugovorima moraju predložiti novu dokumentaciju o vlasništvu što stvarno nema smisla. Propisuju se ti rokovi ograničenja gdje da li svi ljudi mogu izaći iz svojih preduzeća i stajati u redovima u roku od deset dana i da li će onda Toplane omogućiti popodnevi rad gdje će ljudi moći doći i završiti svoje obaveze, ako su to obaveze, i da li će postojati radne subote izuzev te jedne?.,

### **Zastupnik Hamed Aljović je postavio dva zastupnička pitanja:**

„Moje prvo pitanje upućeno prema Agenciji za državnu službu Federacije Bosne i Hercegovine. Molim Agenciju da mi odgovori na osnovu čega utvrđuje nacionalnu pripadnost eksperata koji se nalaze na listi eksperata za odbor rukovodećih i ostalih državnih službenika za Kanton Sarajevo? I da mi dostavi urnek obrasca koji su popunjavali kandidati prilikom apliciranja na javni konkurs.

Drugo pitanje upućeno prema Ministarstvu za obrazovanje i nauku mladih Kantona Sarajevo. Molim Ministarstvo za obrazovanje i nauku mladih Kantona Sarajevo da mi odgovori iz kog razloga Ministarstvo imenuje v.d. članove i predsjednike školskih odbora i pored činjenice da je u januaru 2016. godine objavljen javni konkurs za izbor imenovanja na upražnjene pozicije predsjednika i članova u školskim odborima osnovnih škola kao javnim ustanovama na području Kantona Sarajevo? Obrazloženje: U nekim osnovnim školama u Kantonu Sarajevo Ministarstvo je imenovalo v.d. članove i predsjednike školskih odbora i pored činjenice da je u januaru 2016 godine Ministarstvo objavilo javni konkurs za potpunu upražnjenih pozicija predsjednika i članova u školski odbor osnovnih škola na području Kantona Sarajevo.“

### **Zastupnik Neira Dizdarević je postavila dva zastupnička pitanja:**

„Ja za danas imam osvrtnost na odgovore koje sam dobila od Ministarstva zdravstva Kantona Sarajevo, a vezano je za problem kojim se bavim od mjeseca marta. Problem stomatoloških usluga za djecu sa posebnim potrebama. U svakom odgovoru koji sam dobila od resornog ministarstva, stoji da je osnovni problem nedostatak stručnog kadra, odnosno specijaliste za anesteziologiju i reanimaciju. Stomatološki fakultet u svojim obračunima resornom ministarstvu navodi da raspolaže potrebnim prostorom i opremom i da jedino je neophodna saglasnost Ministarstva za popunjavanje već sistematizovanih radnih mjesta. Međutim Ministarstvo zdravstva vidi rješenje u raspisivanju javnog poziva svim zdravstvenim ustanovama koje obavljaju navedenu djelatnost i koje su spremne pružati usluge osobama sa težim invaliditetom.

Moje pitanje je da li je racionalnije, brže i efikasnije dati saglasnost za upošljavanje anesteziologa na Stomatološkoj klinici koja već raspolaže potrebnom opremom ili raspisivati tendere za private klinike koje će se baviti ovom problematikom? S obzirom da sam dobila i neke novije informacije, ja bih zamolila ministricu Ademaj da nam se danas usmeno obrati, da otklonimo eventualne dileme na koji način i kada konačno će se početi rješavati ovaj problem. Drugo pitanje upućujem Ministarstvu privrede Kantona Sarajevo, također tema kojom su se i ranije bavili moje kolege zastupnici ko trenutno rukovodi hotelom Maršal i po kojem zakonskom osnovu, uzimajući u obzir da je rješenjem od 28.01.2016. za privremenog upravitelja imenovana gospođa Amra Kaljić i to citiram: „do imenovanje direktora preduzeća, a najduže na šest mjeseci“. Dakle šest mjeseci je isteklo krajem mjeseca jula. Molim također i za informaciju kada će se sanacioni problem hotela Maršal naći pred nama zastupnicima s obzirom da je ove godine budžetom, podsjećam, izdvojeno 100 000 KM za sprovođenje sanacionog programa. Dakle kada ćemo konačno vidjeti taj program i na koji način se troše ova sredstva.,,

### **Zastupnik Čomor Eldar je komentarisao dva pitanja koja je postavio na prethodnoj sjednici:**

„Na prethodnoj sjednici Skupštine Kantona Sarajevo postavio sam dva pitanja. Tražio sam da mi se dostavi relevantna dokumentacija o registraciji udruženja „Čuvari Bosne“ registrovanog pri Ministarstvu Kantona Sarajevo, odnosno Ministarstvu pravde i uprave Kantona Sarajevo. Drugo pitanje je bilo i tražio sam da mi se dostavi informacija o eventualnoj uplati novčanih sredstava iz budžeta Kantona Sarajevo udruženju „Čuvari Bosne“ u proteklom period. Odgovor na prvo pitanje od Ministarstva pravde i uprave Kantona Sarajevo jeste da oni nisu u mogućnosti dostaviti relevantnu dokumentaciju o registraciju udruženju „Čuvari Bosne“, jer pod tim nazivom nema upisano udruženje u registar koji se vodi kod ovog ministarstva. Od strane ministarstva finansija dobio sam sljedeći odgovor, „U period od 01.01.2013. do 08.08.2016. iz Budžeta Kantona Sarajevo sa pozicije Ministarstva za boračka pitanja Kantona Sarajevo na račun broj 3387202254274959 Udruženje za zaštitu interesa boračke populacije, istine u odbrani domovine Čuvari Bosne“, ponavljam Čuvari Bosne ponovo, „ IDB: 420209127001 po nalogu Ministarstva za boračka pitanja uplaćena su sredstva u iznosu od 110 000 KM i to kako slijedi. Dana 31.07.2015. uplaćena su sredstva u iznosu od 40 000 KM. 31.12.2015. uplaćeno je 10 000 KM. Ove godine 01.06.2016. uplaćena su sredstva u iznosu od 30 000 KM. 19.07.2016. uplaćena su sredstava u iznosu od 30 000 KM. Pretražujući eventualno postojanje podataka o registraciji navedenog udruženja jer Ministarstvo pravde kaže da nema ovo udruženje registrovano kod nas ovdje, došao sam do zaključka da pri ministarstvu pravde i uprave, znači tamo gdje imamo tabelu registrovanih udruženja pri Ministarstvu pravde i uprave postoji registrovano udruženje „Čuvari“, ne Čuvari Bosne. Punog naziva Udruženje za zaštitu interesa boračke populacije, istine, odbrane države Čuvari“ - Hadžići Hadžali 95. Niko od Hadžićana koji su živi, osim onih koji su eventualno u ovo upleteni, ne zna da to novo boračko udruženje postoji u Hadžićima. Upoređujući podatke

dobijene iz odgovora broj dva, upućenog od strane Ministarstva finansija, da se zaključiti da se zapravo radi o jednom te istom udruženju, jer su IDB broj, odnosno poreski broj udruženja „Čuvari Bosne“ kome je za nepunu godinu dana na žiro račun uplaćeno 110 000 KM i poreski broj udruženja registrovanog pod nazivom „Čuvari“ identičan. Isti slučaj je i kada je u pitanju broj žiro računa. Iz svega gore navedenog da se zaključiti da je naziv udruženja čini mi se „Čuvari Bosne“ upotrebljen namjerno. Zašto? Ja tražim od relevantnih organa da ovo istraže. Također se da zaključiti da je Ministarstvo uplatilo 110 000 KM gotovo nepostojećem udruženju jer isto udruženje u cijeloj BIH nije registrovano pod nazivom „Čuvari Bosne“. Isto tako se da zaključiti da je na osnovu mojih podataka koji se trebaju provjeriti, udruženje formirano 29.07.2015. , a samo dva dana poslije 31.07. prvih 40 000 KM je leglo na račun ovoga Udruženja. Dok se javno zalažemo za smanjenje broja boračkih udruženja dotad tajno pojedinci nažalost formiraju nova boračka udruženja i troše stotine hiljada maraka. Izvinite završavam. Pošto nemam koga drugog da prozovem, ja pozivam premijera Kantona Sarajevo, pozivam ministra finansija da poduzmu sve aktivnosti kako bi se odgovorni za ovakve stvari koje se čine u okviru Vlade Kantona Sarajevo, Budžeta Kantona Sarajevo sankcionisali i kaznili.“

**Zastupnik Mirza Čelik je uputio zastupničku inicijativu:**

„Ja podnosim inicijativu Ministarstvu saobraćaja i to da u što kraćem roku sa predstavnicima uprave Kantonalnog javnog komunalnog preduzeća Gras iznađu rješenje za uspostavljanje redovne minibus linije na rubnim prostorima Kantona Sarajevo, i to na području općine Hadžići, mjesne zajednice Košćan, Drozometina i Osijek.“

**Zastupnik Sabina Čudić je uputila jednu zastupničku inicijativu:**

„Na prošloj sjednici Kolegija Skupštine Kantona Sarajevo, Naša stranka je predložila da se na dnevni red ove sjednice uvrsti i Nacrt zakona o biomedicinski podpomognutoj oplodnji u Kantonu Sarajevo. Da smo to stavili na današnji dnevni red, danas bi smo raspravljali o desetina hiljada parova koji zadnji dinar daju kako bi ostvarili svoju najveću želju, a to je pravo na porodicu. Za razliku od Republike Srpske, za razliku od Hrvatske, za razliku od Srbije i za razliku od čitave Evropske Unije, u Federaciji Bosne i Hercegovine, uključujući i Kanton Sarajevo, medicinsko osiguranje ne podržava dakle, zdravstveno osiguranje, ne omogućava pomoć parovima koji ne mogu prirodnim putem začeti da imaju djecu. S obzirom da je bez obrazloženja naš nacrt uvrštavanje našeg nacrta na dnevni red odbijeno, odnosno uz jedino obrazloženje DF-a da je to predizborni korak. Kako to ne bi bio predizborni korak i kako ovi ljudi ne bi čekali na osnivanje porodice između naših izbornih ciklusa i tako dalje, ja vas pozivam da usvojimo zaključak ove Skupštine kako bi se na narednoj sjednici, eto ako će ona biti poslije izbora, kako bismo ispoštovali i te zahtjeve naših kolega uvrstimo ovaj važni zakon kako bismo mogli raspravljati o njemu. Uvrstiti amandmane eventualne i kako to ne bi bio zakon Naše stranke, već zakon svih nas o biomedicinskoj podpomognutoj oplodnji u Kantonu Sarajevo, te na taj način poslali poruku i Federaciji da se ovo pitanje mora rješavati na svim nivoima vlasti u Bosni i Hercegovini. Mi ćemo do kraja ove tačke imati spreman pismeni zaključak koji jednostavno poziva zastupnike i zastupnice da se izjasne o stavljanju ovog Nacrta na narednu sjednicu kako bismo mogli o ovom važnom Zakonu raspravljati u onom terminu i obimu koji on to zaslužuje.“

**Zastupnik Forto Edin je postavio dva zastupnička pitanja:**

„Ne radi se o inicijativama nego o par pitanja. Imam dva pitanja za ministricu zdravstva i još par pitanja koja ponavljam jer nisam dobio odgovore. Jedno pitanje se odnosi na činjenicu da je imenovan Upravni odbor zdravstvenog osiguranja Zavoda za zdravstveno osiguranje



Kantona Sarajevo I ja bih volio da nam ministrica dostavi odgovor na sljedeće pitanje iz nekoliko djelova. Koliko prijava je zaprimljeno u toku postupka, tj. Javnog poziva za imenovanje predsjednika i članova Upravnog odbora Zavoda za zdravstveno osiguranje Kantona Sarajevo? Da li je pravljen rang lista i prema kojim kriterijama? Ko je od imenovanih članova postavljen po kojem osnovu, odnosno koji su članovi imenovani iz reda osiguranika, koji iz reda poslodavaca, a koji iz reda zdravstvenih radnika? I na kraju, na koji način je vršena provjera postojanja eventualnog sukoba interesa? Poznato je da novoimenovani predsjednik obavlja funkciju direktora u osiguravajućem društvu, dakle u djelatnosti koja je konkurentna ovoj u kojoj je sada imenovan. Također, poznato je da je jedan od članova, advokat Hrvačić, zastupa Kantonalnu firmu Gras u postupku u kojem je već donosena prvostepena presuda protiv Zavoda. Znači imenovali smo u Upravni odbor Zavoda za zdravstveno osiguranje čovjeka koji tuži tu firmu uspješno na sudu. Ako ovo nije sukob interesa, ja stvarno ne znam šta je. Imam još jedno, naravno..“

Drugo pitanje je vezano za Radnu grupu za pisanje politika reforme obrazovanja. Volio bih da nam ministrica objavi ko su članovi Radne grupe koja piše reformu obrazovanja i po kojem osnovu su birani. Reforma zdravstva. Zdravstva, zdravstva, pardon. Samo da saznamo ko su članovi ove grupe koja piše tako važne politike i da li eventualno postoji i tu neki sukob interesa ili da li neko možda je direktor neke od firmi koje će se reformisati, a piše reformu zdravstva. Htio bih da nam također ministrica, ponavljam pitanje od ranije, šta se dešava sa Jedinicom za intenzivnu terapiju na internističku terapiju na Kliničkom centru? Da li je ukinuta, ili ne. Ja sam postavio pismeno to pitanje i ako nam može premijer odgovoriti usmeno, a sigurno to zna, kada ćemo napokon imati eksterni izvještaj revizije Kliničkog centra da bi mogli raspravljati o tom izvještaju na ovoj Skupštini, jer smo sve druge institucije već raspravljali. Hvala Vam. Ovo su pitanja koja sam prije postavljao pa ih samo ponavljam.“

#### **Zastupnik Halilović Semir je podnio dvije zastupničke inicijative:**

„Ja imam inicijativu za Ministarstvo unutrašnjih poslova Kantona Sarajevo da na dvije velike šetnice u Kantonu Sarajevo, to je Aleja ka Vrelu Bosne i ona u Vilsonovom šetalištu ugrade nadzorne kamere na sve ulaze i izlaze ove šetnice, kako bi zaštitili pješake i njihovu sigurnost prilikom vremenskog razdoblja kada je saobraćaj na ovim šetnicama zabranjen. Policija jeste pojačala aktivnosti, one su primjetne u zadnje vrijeme, ali mislim da će ovo riješiti sistemski ovaj problem iz prostog razloga što se kamere zabilježiti svako vozilo koje remeti pješačku zonu. To je jedna inicijativa. Druga inicijativa je za Ministarstvo za boračka pitanja za izgradnju spomen obilježja ili ploče na Igmanu, s obzirom da to nema. Gore se održava velika manifestacija svake godine, pa mislim da je prigodno da ne postoji samo partizansko obilježje, i s obzirom da se gore održava velika manifestacija da se to mjesto obilježi na prigodan način.“

#### **Zastupnik Rasim Lakota je postavio jedno zastupničko pitanje:**

„U zadnje vrijeme u medijima se često moglo čuti ili pročitati informacije o velikim projektima koji su pokrenuti u Kantonu Sarajevo, a odnose se na perspektivne projekte koje će Vlada Kantona Sarajevo analizirati u narednom period i koje će omogućiti razvoj kantona i zapošljavanje većeg broja građana Kantona Sarajevo. Spominju se projekti u općinama Hadžići, Trnovo, Centar, Sarajevo Novi grad, i drugi,... Molim da se ovoj Skupštini dostave pregledi tih projekata, investitori, vrijednost projekata, ciljevi, početak radova i dovršetak projekata. Hvala. A sada bi želio da iskažem i svoje zadovoljstvo na odgovore na koje sam dobio na postavljena poslanička pitanja, pogotovo od ministricе zdravstva Kantona Sarajevo Zilhe Ademaj, a na zadovoljstvo udruženja djece za zaštitu sa poteškoćama u razvoju. Naime, nakon moje inicijative pokrenute su određene aktivnosti i ovaj problem po informacijama

koje ja imam iz Vlade Kantona Sarajevo će biti riješene 01. novembra. Naime, premijer Konaković i ministri Ademaj i Kazazović posjetili su Stomatološki fakultet i dogovorili da se od 01. novembra počne realizirati stomatološke usluge za ovu djecu i dobio sam bezbroj poruka i pisama da na ovoj Skupštini pohvalim i izrazim svoje zadovoljstvo kao i oni koji će pružati te usluge. Također se zahvaljujem i ministru privrede Muharemu koji je također mi je odgovorio adekvatno, Ja sam jako zadovoljan na odgovoru koji sam dobio iz tog ministarstva.“

**Zastupnik Predrag Kojević je postavio jedno zastupničko pitanje:**

„Ja ću iskoristiti svoje vrijeme da govorim o drugom zakonskom prijedlogu kojeg smo pokušali putem Kolegija uvrstiti za ovu sjednicu, ali nažalost nismo dobili podršku. Radi se o Prijedlogu zakona o prijavljivanju i utvrđivanju kontrole imovine izabranih i imenovanih dužnosnika i tako dalje u Kantonu Sarajevo. Podsjećam da je ova Skupština 01. juna na sjednici usvojila Nacrt ovog zakona i odredila zaključak od 60 dana javne rasprave koju smo mi sproveli i je li uvrstili u neke komentare, pripremili prijedlog i poslali ga na neki način da se opet nađe na ovoj sjednici. Svima koji su se bavili ovom problematikom i pročitali ovaj Nacrt zakona je jasno da on ima najbolji efekat ukoliko se počne primjenjivati na neki način od momenta kada ljudi preuzimaju mandate i naša želja, i to smo govorili kada smo obrazlagali nacrt, jeste bila da on dočeka ljude koji će biti na lokalnim izborima biti izabrana općinska vijeća i načelnike. Mislim, ja moram reći da na neki način ovaj zakon više nije naš prijedlog, da je on ušao u određenu proceduru, da je usvojen kao nacrt i da on na neki način postaje vlasništvo ove Skupštine i Vlade. I u zaključku koji ćemo predložiti da ga Skupština usvoji, a to je da se ovaj Zakon također stavi na prvu narednu sjednicu. I samo ako mogu još dvije rečenice o razlogu zašto smo i ovaj Zakon o biomedicinskoj potpomognutoj oplodnji i ovaj Zakon predlagali u ovom trenutku. Nacrt ovog zakona je usvojen u junu, 60 dana javne rasprave, ovo je prva naredna sjednica, a zakon o biomedicinskoj potpomognutoj oplodnji smo predložili sada, jer on zahtjeva određena finansijska sredstva i mislimo da je najracionalnije predlagati tu vrstu zakona u vrijeme kada se budžet Kantona Sarajevo za 2017 godinu planira, kada je on još uvijek u nacrtu i kada možemo tražiti ta sredstva. Evo ja pitam ministra finansija da li je njemu draže da dobije prijedloge zakona koji zahtjevaju finansijska sredstva u decembru ili ovom period sada? „

**Poslanik/zastupnik Zvono Marić je postavio jedno zastupničko pitanje:**

„Ja imam konkretno pitanje, evo za gospodina premijera Konakovića da mi odgovori. Na temelju kojih ingerencija, kompetencija, postulata, mislim u filozofskom smislu, stavova koji su nedokazivi dakle, uzima sebi za pravo da ocjenjuje da li je neko slabo pripremljen kako je kazao za Skupštinu u medijima i na taj način zloupotrebljava svoju funkciju i medije. Naime, primjer je ustvrdio, za one koji ne znaju, da sam ja bio slabo pripremljen za Skupštinu. Prvo jezički, da li za ovaj dom, za ovu Skupštinu ili sjednicu ili tačku o kojoj smo raspravljali dnevnog reda. Pošto on često, najčešće, zapravo vodi računa da kaže što više, a ne vodi o računa o kvaliteti. To je ta nedoumica, ali u svakom slučaju nije imao pravo da to uradi. Više sam ja imao pravo da ocjenjujem rad Vlade kao zastupnik, a ne on kao premijer i to javno, bez mogućnosti da ja odgovorim na tu besmislicu koju je iznio, i osim toga, vrlo je nepristojno i time je deskreditiran, u pokušaju da se ja deskreditiram, diskreditirana funkcija predsjednika Vlade i Vlade. Ne znam da li je premijer toga svjestan, ali jedno ću mu reći da ovdje se vodi parlamentarna rasprava i razmjena mišljenja. Neću valjda reći kao premijer ako ne mislim kao on da sam slabo pripremljen, to je neumjesno. Treba nas dakle postrojiti premijer i ne znam šta on misli, šta je zapravo posao, neko ko dijeli pravdu ovdje. Ko ocjenjuje ljude? Nastavnik, profesor, učitelj. Na kraju ćemo dobiti i ocjene od njega. Mislim da je to vrlo neumjesno. Ja razumijem da postoje ljudi koji bi skočili sa nivoa svoga ega na

nivo svoje pristojnosti i inteligencije da bi poginuli, ali ne razumijem ovoliku količinu nepristojnosti. Znam premijeru da vi znate igrati prljavo i svi koji vas poznaju znaju, ali istina je stara da ko god to radi, igra prljavo, na kraju završi u blatu. Vi možete da namigujete koliko hoćete, ali sasvim svejedno. Vi možete da ignorirate, to su vaši maniri, opće poznato. Dakle, ja nisam došao ovdje da ratujem sa onima koji su na vlasti nego da formuliram interese i na neki način građana i prema tome vodite o tome računa. Drugo pitanje, vrlo kratko. Evo, dešava nam se nekoliko puta, nekoliko puta nam se dešava da povlačite selektivno izvještaje javnih poduzeća. To ste uradili prošli put, sa Šumama, to ste prošli put uradili sa ZOI-em, to ste uradili sada također sa Grasom. Pred čim se to vi povlačite? Pred čim se povlači Vlada? Zašto ne raspravljamo o tim poduzećima? Da li saučestvujete u politici koja je dovela ta preduzeća do propasti? Da li je to predizborna kampanja? Nemate razloga. ,,

**Zastupnik Mirza Čelik je uputio zastupničku intervenciju:**

„Zahvaljujem predsjedavajuća iako ste mi trebali dati odmah riječ da prekinemo ovaj monolog kolege Zvonka. Zaista bih molio Zvonka da se nekako prema premijeru ili bilo kome od članova Vlade niti zastupnika na ovaj način ne obraća. Znači trebao je pripremiti inicijativu, a ne da napravi monolog oko svega ovoga. Evo zahvaljujem i upozoravam kolegu Zvonku Marića da to ne radi. ,,

**Zastupnik Zvonko Marić je uputio repliku zastupniku Mirzi Čeliku:**

„Gospodine Čelik, ja nisam nikakav monolog napravio, ja sam samo obrazloženje dao za pitanje koje želim da mi se odgovori. Vi ni u kojem trenutku tako pristrasno niste reagirali, niste osudili način premijera na koji je to uradio bez mog prisustva. Ili je on ili ste vi možda, ili ga podržavate možda da ocjenjuje nas zastupnike i da moramo misliti kao što mislite vi. Zaboravite tu priču i demagošku i nemojte to više nikada uraditi, da vi kvalificirate. Evo sada ja držim monolog, jel tako? Ja sam samo postavio pitanje, pokušaja diskreditacije premijera, je li to smio da uradi? Koji je to premijer uradio? Nikada niko, ali možete naravno, stranački ste kolege, pa eto pokušavate da branite nešto što se odrbaniti ne može.“

**Zastupnik Mersiha Mehmedagić je postavila jedno zastupničko pitanje:**

„ Za danas imam jedno zastupničko pitanje i izrazit ću nezadovoljstvo, odnosno tražiti dodatno pojašnjenje za određena ranije postavljena pitanja. Zastupničko pitanje upućujem Ministarstvu zdravstva i Vladi Kantona Sarajevo, a ono glasi: Na osnovu koje odluke JU Domovi zdravlja Kantona Sarajevo naplaćuje participaciju za tretman manuelne masaže cijele kičme u iznosu od 10 KM pacijentima upućenim na fizikalne terapije. Obrazloženje je sljedeće: Odluka o ličnom učešću osiguranih lica u troškovima korištenja zdravstvene zaštite i snošenja troškova liječenja na teritoriji Kantona Sarajevo, Službene novine Kantona broj 28/04 propisuju u članu 2 da se participacija za usluge medicinskog osoblja plaća u slučajevima kućne posjete i konzilijarnog ljekarskog pregleda koji se vrše na zahtjev osiguranog lica. U svim ostalim slučajevima navedenim u ovom članu odluke participacija se plaća za preglede ili pretrage koje zahtjevaju korištenje određenih dijagnostičkih aparata. Pacijenti upućeni na fizikalnu rehabilitaciju za dnevni tretman manuelne masaže cijele kičme u trajanju od 5 min plaćaju JU Domovi zdravlja Kantona Sarajevo participaciju od 10 KM. S obzirom da fizikalne terapije najčešće traju od 7 do 10 dana, pacijenti izdvoje značaj iznos za usluge fizioterapeutskeg tehničara za čije plaće i naknade Zavod zdravstvenog osiguranja uredno izdvaja sredstva. Po kojoj odluci JU Domovi zdravlja naplaćuje participaciju u iznosu od 10 KM za navedeni tretman ako o odluci iz 2004 godine koja je jedina dostupna na stranici Ministarstva zdravstva i Zavoda zdravstvenog osiguranja Kantona Sarajevo u članu 2.28 stoji da, citiram: „Osigurana lica lično učestvuju u troškovima korištenja zdravstvene zaštite,

između ostalog i za dnevni tretman iz fizikalne medicine i rehabilitacije 1 KM. Što se tiče odgovora na pitanje vezanog za snabdjevenost ANATE vakcinama, zamolila bih ministricu da mi samo objasni ovu tendenciju. Broj potrebnih vakcina prema podacima koje je dala JU Dom zdravlja Kantona Sarajevo je 8 730. Sadašnje stanje je 462 vakcine. Javna ustanova to Pravda problemima sa dobavljačem Torlak iz Beograda i ta količina je trebala biti poznata do ponedjeljka 11.07.2016., pa ću zamoliti ministricu ako ima taj podatak sada da iznese, a ako nema pismeno da mi dopuni ovaj odgovor. S druge strane, upravo je simptomatično zašto postoje problem sa snabdjevenošću upravo ovim vakcinama ovog snabdjevača. Ako pogledamo koliko koštaju te vakcine, njihova maloprodajna cijena je 5,60 KM. Sada se odjednom pojavljuju kao nema tih vakcina, ali ima vakcina bugarskog proizvođača koje koštaju 9 KM i ima vakcina francuskog proizvođača koje koštaju 19 KM i onda generalni direktor javne ustanove Domovi zdravlja kaže da je očito da će se ovaj problem morati rješavati na nivou Ministarstva zdravstva Kantona Sarajevo i Zavoda zdravstvenog osiguranja kantona, jer se ove cijene neće moći uklopiti u finansijski plan ustanove, ukoliko bude jedina alternativa. Molim ministricu da ove navode objasni. I imam još dva nezadovoljstva na postavljena pitanja. Naime, Ministarstvu za boračka pitanja Kantona Sarajevo sam postavljala u više navrata pitanje vezano za evidenciju broja osoba, odnosno članova ili djece šehidskih porodica. Koliko ih ima nezaposlenih? Nikada nisam ni od Ministarstva ni od Vlade dobila taj podatak i to je zaista sramotno. I nisam dobila odgovor na pitanje koje sam postavila Ministarstvu obrazovanja nauke i mladih Kantona Sarajevo vezano za dostavljanje ugovora uposlenice o čijoj problematici sam govorila u svojoj inicijativi. ,,

**Zastupnik Srna Bajramović Segmedina je postavila dva zastupnička pitanja:**

„Ja nemam inicijativu, imam dva pitanja. Naime prema članu 12 Zakona o plaćama i naknadama članova organa upravljanja i drugih institucija Kantona Sarajevo, mjesečna naknada predsjedniku upravnog odbora javne ustanove može biti najviše 50 % prosječne neto plaće isplaćene u Federaciji Bosne i Hercegovine u posljednja tri mjeseca za članove najviše 40%. Međutim svjedoci smo da je Vlada Kantona Sarajevo donijela odluku koja je u potpunoj suprotnosti sa usvojenim zakonom, a koja je objavljena u Službenim novinama 21. jula 2016 godine. Prema ovoj Odluci o dopuni Odluke o visini mjesečne naknade za rad predsjednika i članova upravnog odbora javnih zdravstvenih ustanova čiji je osnivač Kantona Sarajevo utvrdila je naknadu predsjedniku upravnog odbora Zavoda zdravstvenog osiguranja Kantona Sarajevo od 720 KM mjesečno, a članovima 600 KM. Naravno, pitanje samoj Vladi definiše se samo po sebi. Šta je stvarni razlog zbog kojeg je Vlada Kantona Sarajevo odlučila napraviti nezakonit potez i baciti pod noge sve svoje principe, pa ako hoćete i standarde kojima se hvalila kod usvajanja zakona o plaćama, te da li planira ovu odluku staviti van snage? Ne želim vjerovati, ali sve upućuje na to kako se labava parlamentarna većina održava upravo ovakvom i sličnim odlukama. Naravno, Vlada je ta koja je sada na potezu i ima priliku ovu cjelokupnu situaciju razrješiti na zakonit način, i između ostalog račistiti sve drugo što im se samo po sebi stavlja na teret zbog prirode sam odluke. Moje drugo pitanje. Naime, već mjesecima imamo priliku da se suočavamo sa dijametralno suprotnim, tj. apsolutno kontradiktornim informacijama kada je u pitanju stanje u Klinčkom centru Univerziteta u Sarajevu. U jednom trenutku svjedočimo pojedinim medijima, informacijama o napretku u svakom smislu koji je rezultat rada novog menadžmenta, dok u drugom imamo informacije o odlasku eminentnih doktora sa većina klinika do situacije koja je zgrozila javnost, a to je činjenica kako nije bilo reagensa za nalaz trogodišnjeg djeteta. S obzirom da se radi o ustanovi koju građani Kantona Sarajevo dominantno finansiraju sredstvima iz Zavoda zdravstvenog osiguranja, smatram da je apsolutno neprihvatljiva činjenica da u okviru pružanja zdravstvene zaštite građanima Kantona Sarajevo imamo situaciju o mogućnostima ne pružanja elementarnih zdravstvenih usluga. Uzimajući u obzir prethodno navedeno, pitam

resorno Ministarstvo zdravstva da li je upoznato navedenom slučaju, te da li se radilo samo o jednokratnom incidentu kada je u pitanju nedostatak reagensa ili građani Kantona Sarajevo moraju u narenom period očekivati da prilikom posjete Kliničkom centru budu upućivani u private zdravstvene ustanove kako bi osigurali sebi adekvatnu zdravstvenu zaštitu naravno uz plaćanje. Želim vjerovati kako situacije koje imamo nisu dobro isplanirani mehanizam erozije usluga i javnog zdravstvenog sektora kojim će se građani Kantona Sarajevo natjerati da svoju zdravstvenu zaštitu ostvaruju dominantno u privatnim zdravstvenim klinikama čime bi se privatizacija zdravstva učinila tihim putem, a samim tim otvorio prostor za realizaciju upitnih reformskih projekata o kojima smo mjesecima slušali.“

**Zastupnik Mario Vukasović je postavio jedno zastupničko pitanje i jednu inicijativu:**

„Danas imam pripremljeno jedno pitanje i jednu inicijativu. Prvo pitanje jeste upućeno Upravnom odboru Studentskog centra Sarajevo, Ministarstvu obrazovanja i nauke, Vladi Kantona Sarajevo. Zašto Upravni odbor studentskog centra nije postupio po zakonu nakon više od dva mjeseca od izglasavanja dva negativna finansijska izvještaja, smjenio direktora, a što su bili po zakonu dužni? Podsjećamo član 41. Uredbe sa zakonskom snagom o ustanovama Federacije BiH u jednom od stavova kaže: „Kada je osnivač odgovoran za obaveze ustanove, dužan je razrješiti predsjednika i članove upravnog odbora, ako je ustanova za dvije uzastopne godine u godišnjem obračunu ukazala višak rashoda nad prihodima“. U ovom slučaju upravni odbor dužan je da razrješi direktora ustanove. Tražim od Upravnog odbora da postupi po gore navedenom članu zakona. U period kako su oborena ova dva finansijska izvještaja, direktor je izvršio još tri uposlenja, iako je moratorij još na snazi. Zamolio bih pismeni odgovor, da se premijer usmeno očituje o navedenoj situaciji. Druga inicijativa jeste, upućujem prema Vladi Kantona Sarajevo, jer ne znam ko je nadležan za navedeno pitanje. Svjedoci smo da je korito rijeke Miljacke na pojedinim mjestima izuzetno zapušteno, a jedno od takvih mjesta koje predstavlja ruglo jeste i dio korita Miljacke ispod mosta na Malti. Prije nekih sedam, osam godina usljed velikih padavina, velika količina zemlje se odronila i upala u Miljacku, te se na tom mjestu danas nalazi ostrvo na kojem najnormalnije raste drveće, a koje zauzima polovinu cijelog korita na tom mjestu. S obzirom da nisam siguran čija je nadležnost u pitanju, molim vladu Kantona Sarajevo da uputi ovu inicijativu na pravu adresu, te da se pristupi čišćenju tog dijela Miljacke, a za šta se sredstva izdvajaju kroz vodne naknade.“

**Zastupnik Bebija Kerla je postavila dva zastupnička pitanja:**

„Ja za današnju sjednicu imam dva pitanja. Prvo pitanje se odnosi na Ministarstvo obrazovanja i ono glasi: Šta će poduzeti Vlada Kantona Sarajevo i Ministarstvo za obrazovanje nauku mladih da se poštuje odredba Zakona o srednjem obrazovanju, a koje se odnosi na izbor direktora i raspisivanje konkursa za izbor direktora u Srednjoj školi za tekstil i kožni dizajn. Naime, direktoru navedene škole istekao je drugi mandate i on nema pravo da konkuriše za novi izbor. Navedeni direktor je i vijećnik Vijeća Opštine Novi Grad i Gradskom vijeću. Školsko vijeće je prošle godine raspisalo konkurs za izbor direktora. Na ovaj kao objavljeni konkurs javio se sadašnji direktor, koji nije imao pravo. Školski odbor ga imenuje, za vršioca dužnosti direktora, a kojem je ustvari istekao mandate. Školski odbor u roku od 6 mjeseci nije raspisao novi konkurs za izbor direktora, jer se vjerovatno svjesno ne raspisuje, čeka se usvajanje novog Zakona za srednje obrazovanje, pa molim ministra da se usmeno očituje o ovom mom pitanju, a naravno i pismeni odgovor. Što se tiče drugog mog zastupničkog pitanja, ono je upućeno Ministarstvu sporta i kulture. Molim ministarstvo da mi dostavi raspored korištenja termina koje plaća iz Budžeta u sportskim dvoranama Skenderija i Zetra. Obrazloženje: S obzirom da navedeni projekat za cilj ima vraćanje dvorana mladima i

populaciji i sportu, molim Ministarstvo da mi dostavi podatke o kriterijima posatvljanja termina, zauzetih sportskih dvorana i korisnicima, odnosno klubovima koji koriste navedene dvorane.“

### **Zastupnik Mirsad Pindžo je podnio ispravku krivog navoda:**

„Ja nemam pitanja, ali imam potrebu da reagujem s obzirom da je Stranka i Klub kojim ja rukovodim prozvani obmanjivanjem i neistinama, i želim da iskoristim poslovničko pravo da ispravim krivi navod i drugo, da upozorim na kršenje Poslovnika o radu Skupštine Kantona Sarajevo, znači po dva osnova. Kada je bila sjednica Kolegija za zakazivanje današnje sjednice, jedino je tačno da je kolega Kojević tražio da se uvrste u dnevni red ova dva zakona, sve ostalo nije tačno jer ti zakoni nisu ni dostavljeni Skupštini Kantona Sarajevo, ni do danas. Ni jedan. Novinari će objaviti, oni nemaju tu profesionalnu etiku da saslušaju i jednu i drugu stranu, već objave ono što im se servira. Ja nisam htio da reagujem na to, nema ni potrebe. Ali pošto se i danas koristi ova govornica za populističke i predizborne svrhe, onda moram ukazati na sljedeće činjenice. Zakon o prijavljivanju porijeklu i kontroli imovine izabranih dužnosnika nosioca izvršnih funkcija u Kantonu Sarajevu, bio tri puta na dnevnom redu Skupštine Kantona Sarajevo. 15.10, 07.10.2015. čitava stranica zaključaka ove Skupštine koja obavezuje Vladu šta da uradi u tom Zakonu. Zakon umjesto Vlada da pripremi, jer i tamo stoji rok od 45 dana da pripreme zakon, nisu pripremili, prepustili kolegi Kojeviću, to je sada druga priča zašto, neću da ulazim u to. I na dnevnom redu sjednice skupštine 01.06. se našao Nacrt zakona, predlagač kolega Kojević. Ova Skupština se izjasnila o tom zakonu, donijela zaključke i zadužila kolegu Kojevića kao predlagača da provede javnu raspravu, dostavi izvještaj sa svim potrebnim mišljenjima kako Poslovnik nalaže i da se uvrsti zakon u dnevni red. Šta su činjenice, od tada pa do danas, do današnjeg dana, jer sam sad upravo provjerio, nisam htio da lupam i da vodim kampanju i populistički nastupam kako to rade kolegica Čudić, kolega Kojević. Niti je provedena rasprava ni u jednom organu, niti je zakazana javna rasprava, niti je kolega Kojević dostavio nacrt ovoga Zakona skupštinskoj službi da ga uputi i kome da ga uputi, niti je sumirana javna rasprava, niti je podnesen izvještaj o provedenoj javnoj raspravi, niti je dostavljen Vladi, Uredu za zakonodavstvo, Ministarstvu pravde, sve što nalaže donošenje zakona, da bi tek onda došao do skupštinske službe do Kolegija, da bi ga mogli uvrstiti u dnevni red. To su činjenice i zato nema tog zakona na dnevnom redu. Drugi zakon, Zakon o potpomognutoj oplodnji, tako ga zovu kada ga predlažu. Niko ga još nije ni video, nema ga u skupštinskoj službi. Ako vi mislite kolege da ćemo mi prihvatati da raspravljamo o nekim vašim zakonima koje vi držite u ladicama i u đepovima, pa da ih donesete ovdje nama na klupe da o njima raspravljamo, a radi se o sistemskim zakonima, onda naravno da mi to nećemo podržavati. Naravno da nećemo podržavati. Ispoštujte poslovničku procedure i zakoni će se naći na dnevnom redu. Predlažete i danas zaključak koristeći ove kamere da vodite populističku predizbornu kampanju, predlažete zaključak na zaključak suprotno Poslovniku o Skupštine Kantona. Evo ja vam čitam zaključak Skupštine Kantona Sarajevo, tačka 4, predlagač Predrag Kojević je dužan da nakon provedene javne rasprave podnese Skupštini izvještaj o rezultatima javne rasprave koji sadrži primjedbe, prijedloge, mišljenja, kao i da se obrazloženje razloga zbog kojih primjedbe, prijedlozi i mišljenja nisu prihvaćeni u priremi Prijedloga zakona o peijavljanju, porijeklu i konrole imovine izabranih dužnosnika. Jel to ispoštovano? Nije! O čemu ćemo se mi danas izjasniti? O nečemu što je poslovnički regulisano. E sad tu dolazimo do kršenja Poslovnika. U poslovniku decidno kaže: Skupština se zaključkom izjašnjava o nečemu što nije propisano ovim Poslovnikom. Ovo je propisano gospodo, propisana procedura donošenja zakona. Tačno se znaju koraci koje treba poduzeti da bi se zakon našao na dnevnom redu. I nemojte prozivati nikoga, vodite kampanju, niko vam ne brani. Budite populist, što i jeste, ali nemojte druge dirati i obmanjivati javnost. „

**Zastupnik Predrag Kojević je podnio repliku na izlaganje zastupnika Mirsada Pindže:**

„Zahvaljujem predsjedavajuća. Ja ne želim da ulazim sa kolegom Pindžom u raspravu, samo imam potrebu da nekoliko činjenica isteknem. Prije svega svega organizovali smo javnu raspravu i imamo sve ono ští javna rasprava zahtjeva i predlagali smo na Kolegiju da se ova dva zakona uvrste u dnevni red. Da je Kolegij uvrstio ova dva zakona u dnevni red, vi biste kako to Poslovník i zakon nalaže, onda dobili materijal u kojem biste imali prijedlog i drugi nacrt zakona i ono sve što smo imali iz javne rasprave. Mi smo međutim bez obzira što kolegij nije uvrstio ova dva zakona u dnevni red za današnju sjednicu, predali oba ova zakona. Jedan prijedlog, jedan nacrt na protokolu i to možemo vrlo jednostavno potvrditi, jer mi imamo one brojeve koje dobijete kada trebate na protokol i to je.“

**Predsjedateljica:**

„31.08. je, mi to još nismo dobili uvaženi gospodine.“

**Zastupnik Predrag Kojević:**

„Vidite, ja mogu da razumijem da vi to niste dobili, ali ja samo kako bih rekao, kako kolega Pindo kaže da nismo nikada ništa predali i tako dalje. Evo ja sam samo htio da razjasnim te neke činjenice, a ostalo ne želim uopšte ulaziti u to. Još ovu rečenicu. Naši su predstavnici u smislu prijedloga zakonskih prijedloga, ja mislim zaista bili fantastični. U federalnom parlamentu imamo preko 40, na općinskim novinama preko 300. Ako kolega Pindo misli da je sve to što smo radili, uključujući i sve zakonske prijedloge koje smo predlagali ovdje, dio predizborne kampanje, ja onda pozivam i druge stranke da na taj način traže, kako bih rekao, povjerenje glasača. Znači konkretnim, vrlo preciznim radom, zakonskim prijedlozima, a ne samo kako bih rekao praznim pričama.“

**Zastupnik Mirsad Pindžo je uputio repliku na izlaganje zastupnika Predraga Kojovića:**

„Kolega Kojeviću, ja ne znam šta ste vi radili u drugim zakonodavnim organima. Ono malo što vas ima u lift možete stati, a znam šta ste ovdje radili. Recite mi samo jedan zakon koji ste podnijeli ovoj Skupštini Kantona Sarajevo u regularnoj proceduri da se Skupština o njemu raspravljala, osim ovaj zakon koji je napravio Dino Konaković, kao tadašnji zastupnik prethodnom mandatu i Vlada Kantona prosljedila ga Skupštini, jer je gospodin Konaković u drugoj ulozi. Drugo, sami ste demantovali ovo što sam ja i odnosno potvrdili, sami sebe demantovali, a potvrdili ono o čemu sam ja govorio. Niste ispoštovali proceduru, niste dostavili prijedloge zakona, oni se nisu danas mogli naći na dnevnom redu, i to je populizam i predizborna kampanja. 31.08. je na protokolu, u skupštinskoj službi još nije dostavljeno. Kada je bila sjednica Kolegija? Zna li? Naravno sedam dana prije toga. Zna li za poslovničku odredbu da 12 dana materijali moraju doći zastupnicima? Zastupnicima moraju doći, 12 dana. Znači morali ste dostaviti najmanje mjesec dana prije toga, da bi dobili mišljenje i vlade i ministarstva pravde i uprave i Ureda zakonodavstva da bi zastupnici 12 dana, znači prije održavanja sjednice Kolegija, imali materijal pred sobom. Ako ste mislili iskoristiti poslovničku mogućnost, ovo što omogućavamo Vladi kada je hitna procedura, da im četiri dana prije sjednice uvrstimo u dnevni red, onda se grdno varate. Ni Vladi nikada nismo dozvolili da sistemske zakone dostavi četiti dana prije sjednice. Ne znam zašto bi to vama dostavljali. Hvala lijepo. Odnosno omogućavali.“

**Zastupnik Sabina Čudić je uputila repliku na izlaganje zastupnika Mirsada Pindže:**

„Molim vas, samo da razjasnimo najosnovniju, najbanalniju stvar vezano za nacрте zakona. Da su ova dva zakona prihvaćena na Kolegiju u vidu nacрта, taj dan bi bili dostavljeni na isti način na koji se dostavlja materijal nakon Kolegija svim zastupnicima. Valjda je jasno da na

naše adrese ne dobijamo materijal prije Kolegija. Materijal dobijamo nakon Kolegija. Da je Kolegij odlučio da uvrsti ova dva zakona za današnju sjednicu, oba zakona bi bili u sandučićima poslanika. S obzirom da je kolega Pinđo jedini koji je decidno glasao protiv uvrštavanja ovih zakona, onda je valjda jasno da ih nismo mogli slati uprkos činjenici da nisu uvršteni. Zatim smo otišli na protokol, predali zakone i nudimo u vidu inicijative da ispoštujemo čak i prijedlog gospodina Pinđe da se ovi zakoni razmatraju i usvajaju nakon izbora, što sam naglasila u svom obraćanju, na narednoj sjednici skupštine Kantona Sarajevo, te pozivam kolegu Pinđu i sve ostale zastupnike i zastupnice kada su u pitanju ovi zakoni, pogotovo zakon koji sama predlažem da predlože amandmane i da ovo ne bude zakon Naše stranke, već zajednički Zakon o biomedicinski potpomognutoj oplodnji. Zato molim vas, nema uopšte potrebe da pričamo o predizbornoj kampanji, ako govorimo o uvrštavanju nečega na dnevni red, I raspravi kojoj ovaj zakon zaključuje za mjesec dana.“

**Zastupnik Mirsad Pinđo:**

„Ja ne vodim raspravu, ali sam prozvan i opet netačne informacije i naravno da moram reagirati. Da je kolega Kojević to izgovorio ne bi više po Poslovniku imao pravo, ali kod kolegice Čudić ima pravo. Kolegice Čudić, što se mene lično tiče, i tako nastupam i uvijek sam nastupao. Ja se ne krijem iza toga bit ću nešto suzdržan da ne budem ni za ni protiv. Naravno da, bio sam protiv zato što niste ispoštovali procedure, zato što niste dostavili zakon, zato što ne znamo čemu da se izjašnjavam i neću da razgovaram šta ćete vi dostaviti nakon mog izjašnjavanja. Ispoštujte procedure i imat ćete moj glas za, za bilo koji zakon, jer vama Poslovnik, isto kao i meni dozvoljava da predlažete zakone. Samo morate shvatiti jedno, da morate poštovati procedure. Niste ih ispoštovali i ne bi ih mogli ispoštovati nakon sjednice Kolegija, jer te zakone ste dostavili 31.08., a prije toga ste ih morali dostaviti i Vladi koja kaže da se vlada mora izjasniti ako ona nije predlagač zakona. Kako će se izjasniti kada nije dostavljeno? Uopšte, ni zakon, a ne na izjašnjenje. Kako će se izjasniti Ured zakonodavstva? Kako Ministarstvo pravde? Gospodo, nema potrebe da polemišemo kod toga. Ovo je čisti populizam, čista predizborna kampanja. Ja vas molim nemojte raditi obmanjivanje javnosti. Ispoštujte procedure i budite sigurni da ćete imati moju podršku za svaki takav prijedlog da se uvrsti, da se razgovara, raspravlja, a hoće li biti prihvaćen ili neće u kom obliku, to je sada već druga priča. „

**Predsjedateljica:**

„Hvala lijepo uvaženi zastupniče Pinđo. Ja bih pitala uvaženu zastupnicu Čudić na koju adresu ste poslali ovaj Nacrt zakona?“

**Poslanik/zastupnik Sabina Čudić:** / Ne čuje se, govori bez mikrofona /

**Predsjedateljica:**

„Nema pečata, evo. Znači mi moramo imati pečat da je primljeno. To mora doći na moj kabinet. Dakle, ja to nisam dobila još uvijek. Evo danas je 07. Onog trenutka kad dođe, mi ćemo na sljedećoj sjednici to uvrstiti, odnosno Kolegiju, uvrstiti u dnevni red.

**Zastupnica Sabina Čudić:** /Ne čuje se, govori bez mikrofona/

**Predsjedateljica:**

„Kad dođe nacrt na moj sto, onda to idemo po proceduri i skupštinskog Poslovnika, idemo u raspravu.“



*Predsjedateljica* je potom zaključila prvu tačku dnevnog reda, te dala riječ premijeru Elmedinu Konakoviću i ministrici zdravstva, Zilhi Ademaj, da daju usmene odgovore na neka od postavljenih pitanja. U diskusiji koja je potom uslijedila učestvovali su zastupnici: Mersiha Mehmedagić, Edin Forto, Neira Dizdarević, Zvonko Marić, Sabina Ćudić, te po ovlaštenju sekretar Skupštine Almira Kulovac Šetkić.

**Prešlo se na razradu druge tačke dnevnog reda.**

**AD -2.**

**PRIJEDLOG ZAKONA O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE S DJECOM**

*Predsjedateljica* je podsjetila da su zastupnici dobili materijale uz poziv za sjednicu.

*Ministrica Alma Dautbegović* je podnijela uvodno izlaganje u ime Predlagača.

Pitanje je postavila zastupnica Neira Dizdarević.

U diskusiji su učestvovali zastupnici: Segmedina Srna Bajramović, Rasim Lakota, Semir Halilović.

**SKUPŠTINA JE JEDNOGLASNO (22 „ZA“) USVOJILA ZAKONA O IZMJENAMA I DOPUNAMA ZAKONA O SOCIJALNOJ ZAŠTITI, ZAŠTITI CIVILNIH ŽRTAVA RATA I ZAŠTITI PORODICE S DJECOM**

**Prešlo se na razmatranje treće tačke:**

**AD – 3.**

**PRIJEDLOG STRATEGIJE RAZVOJA KANTONA SARAJEVO DO 2020. GODINE**

*Predsjedateljica* je podsjetila da su zastupnici dobili materijale uz poziv za sjednicu.

*Aida Fetahagić*, koordinator Kantonalnog odobra za razvoj i pomoćnik direktora za planiranje društveno ekonomskog razvoja Zavoda za planiranje razvoja Kantona Sarajevo je podnijela uvodno izlaganje u ime Predlagača.

Pitanje je postavio zastupnik Semir Halilović, a gospođa Aida Fetahagić je odmah odgovorila na isto.

U diskusiji su učestvovali zastupnici: Semir Halilović, Mario Vukasović, Segmedina Srna Bajramović, Zvonko Marić, Mersiha Mehmedagić, Muhamed Kozadra.

Premijer Elmedin Konaković je dao odgovore na neka postavljena pitanja u toku diskusije.

**SKUPŠTINA JE JEDNOGLASNO (28 „ZA“) USVOJILA STRATEGIJU RAZVOJA KANTONA SARAJEVO DO 2020. GODINE.**

Skupština je podržala zaključak zastupnika Maria Vukasovića, koji glasi:

*Zadužuje se Vlada Kantona Sarajevo, da jednom godišnje pripremi evaluaciju, analizu i reviziju Strategije razvoja Kantona Sarajevo do 2020., te je na kraju godine prezentuje i proslijedi Skupštini Kantona Sarajevo na raspravu.*

Potom je predsjedateljica dala pauzu od sat vremena zbog istovremenog održavanja sjednice Doma naroda Parlamenta Federacije BiH, kojoj su delegati iz Kantona Sarajevo trebali prisustvovati.

#### **NASTAVAK NAKON PAUZE**

Prilikom otvaranja nastavka sjednice, predsjedateljica se izvinula zastupnicima za dužu pauzu od predviđene zbog dužine sjednice Doma naroda, a potom pozvala na razradu četvrte tačke dnevnog reda.

#### **AD – 4.**

#### **PRIJEDLOG ODLUKE O IZMJENAMA ODLUKE O PROVOĐENJU PROSTORNOG PLANA POSEBNOG PODRUČJA PRIRODNOG NASLIJEĐA “VODOPAD SKAKAVAC“-SKRAĆENI POSTUPAK**

Ministar prostornog uređenja, građenja i zaštite okoliša, *Čedomir Lukić* je dao uvodno obrazloženje razloga za donošenje ove Odluke po sraćenom postupk, u skladu sa članom 158. stav 2. Poslovnika Skupštine Kantona.

Nije bilo prijavljenih zastupnika za pitanja i diskusiju.

SKUPŠTINA JE S 23 GLASA „ZA“ PRIHVATILA DA SE PRETRES PRIJEDLOGA ODLUKE O IZMJENAMA ODLUKE O PROVOĐENJU PROSTORNOG PLANA POSEBNOG PODRUČJA PRIRODNOG NASLIJEĐA “VODOPAD SKAKAVAC“ PO SKRAĆENOM.

Predsjedateljica je otvorila diskusiju po ovoj tački, no nije bilo prijavljenih, pa je istu zatvorila i pozvala zastupnike na izjašnjanje.

SKUPŠTINA JE S 25 GLASA „ZA“ DONIJELA ODLUKU IZMJENAMA ODLUKE O PROVOĐENJU PROSTORNOG PLANA POSEBNOG PODRUČJA PRIRODNOG NASLIJEĐA “VODOPAD SKAKAVAC“-SKRAĆENI POSTUPAK.

#### **Peta tačka dnevnog reda:**

#### **AD – 5.**

#### **PRIJEDLOG ODLUKE O DAVANJU OVLAŠTENJA ZA OBAVLJANJE FUNKCIJE SEKRETARA SKUPŠTINE KANTONA SARAJEVO**

Zastupnici su dobili Prijedlog odluke u dopunskom materijalu.

*Zastupnik Kemal Ademović*, u svojstvu predsjedavajućeg Komisije za izbor i imenovanje i administrativna pitanja, je podnio uvodno izlaganje.

Nije bilo prijavljenih zastupnika za pitanja niti diskusiju, te je predsjedateljica pozvala na izjašnjavanje

SKUPŠTINA JE JEDNOGLASNO (26 „ZA“) DONIJELA ODLUKU O DAVANJU OVLAŠTENJA ZA OBAVLJANJE FUNKCIJE SEKRETARA SKUPŠTINE KANTONA SARAJEVO.

**Šesta tačka dnevnog reda:**

**AD – 6.**

**PRIJEDLOG ODLUKE O UTVRĐIVANJU POSTOJANJA JAVNOG INTERESA ZA OSNIVANJE JAVNE USTANOVE OSNOVNA ŠKOLA “ŠIP” Sarajevo**

*Predsjedateljica* je konstatovala da su zastupnici dobili Prijedlog odluke uz poziv za sjednicu.

Zastupnici su smatrali da nema potrebe za uvodnim izlaganje. Nije bilo zastupničkih pitanja. U diskusiji je učestvovali zastupnici: *Segmedina Srna Bajramović i Kemal Ademović.*

SKUPŠTINA JE JEDNOGLASNO (26 „ZA“) DONIJELA ODLUKU O UTVRĐIVANJU POSTOJANJA JAVNOG INTERESA ZA OSNIVANJE JAVNE USTANOVE OSNOVNA ŠKOLA “ŠIP.

**Sedma tačka dnevnog reda:**

**AD – 7.**

**PRIJEDLOG ODLUKE O OSNIVANJU TURISTIČKE ZAJEDNICE KANTONA SARAJEVO**

*Predsjedateljica* je konstatovala da su zastupnici dobili Prijedlog odluke uz poziv za sjednicu.

*Ministar privrede Muharem Šabić* je podnio uvodno izlaganje u kom je obavijestio prisutne da je Vlada Kantona Sarajevo imala hitno zasjedanje na kom je donijela prijedlog dva amandmana na ovu Odluku, koji glase:

Amandman I

Vlada Kantona Sarajevo predlaže da se Prijedlog odluke o osnivanju Turističke zajednice Kantona Sarajevo uskladi sa Zakono o registraciji poslovnih subjekata u FBiH Sl. Novine Federacije broj 27/05 i 68/05, 48/05, 43/09 i 63/14 na način da se u članu 16 stav 1 dodaju riječi :“da predsjednik Turističke zajednice predstavlja i zastupa turističku zajednicu bez ograničenja“.

Amandman II

Vlada Kantona Sarajevo predlaže da se Prijedlog odluke o osnivanju turističke zajednice Kantona Sarajevo uskladi sa Zakonom o registraciji poslovnih subjekata FBiH, Sl. Novine FBiH broj 27/05, 68/05, 43/0 i 63/14. na način da se dopuni član 19 stav 1, tako da se iza

tačke a dodaje nova tačka b) koja glasi: „Djelatnosti turističke zajednice“ a dosadašnje tačke b do k) postaju nove tačke od c) do i).

Potom je i premijer Elmedin Konaković uzeo riječ, te dao par dopuna.

Zastupničko pitanje je postavila zastupnica *Sabina Ćudić*, a u diskusiji je učestvovala zastupnica *Mersiha Mehmedagić*.

*Premijer Elmedin Konaković* je u više navrata davao komentare na diskusiju zastupnica.

SKUPŠTINE JE VEĆINOM GLASOVA (21 „ZA“) DONIJELA ODLUKU O OSNIVANJU TURISTIČKE ZAJEDNICE KANTONA SARAJEVO, SA PREDLOŽENIM AMANDMANIMA, KOJI SU POSTALI SASTAVNI DIO ODLUKE.

Osmo tačka dnevnog reda:

#### **AD – 8.**

**PRIJEDLOG ODLUKE O DAVANJU SAGLASNOSTI NA NACRT SPORAZUMA O REGULISANJU MEĐUSOBNIH PRAVA I OBAVEZA IZMEĐU KANTONA SARAJEVO - MINISTARSTVO SAOBRAĆAJA I OPĆINE NOVO SARAJEVO NA ZAJEDNIČKOJ IZGRADNJI PODZEMNE GARAŽE G3 U ULICI KOLODVORSKA U SARAJEVU**

*Predsjedateljica* je napomenula da su zastupnici dobili ovaj prijedlog uz poziv za sjednicu.

*Ministar saobraćaja Mujo Fišo* je podnio uvodno izlaganje.

Nije bilo prijavljenih zastupnika za pitanja ili diskusiju, te je predsjedateljica zaključila tačku i pozvala na izjašnjavaње.

SKUPŠTINE JE VEĆINOM GLASOVA (27 „ZA“) DONIJELA ODLUKU O DAVANJU SAGLASNOSTI NA NACRT SPORAZUMA O REGULISANJU MEĐUSOBNIH PRAVA I OBAVEZA IZMEĐU KANTONA SARAJEVO - MINISTARSTVO SAOBRAĆAJA I OPĆINE NOVO SARAJEVO NA ZAJEDNIČKOJ IZGRADNJI PODZEMNE GARAŽE G3 U ULICI KOLODVORSKA U SARAJEVU.

Deveta tačka dnevnog reda:

#### **AD – 9.**

**PRIJEDLOG ODLUKE O DAVANJU SAGLASNOSTI KANTONALNOM JAVNOM KOMUNALNOM PREDUZEĆU “VODOVOD I KANALIZACIJA” D.O.O. SARAJEVO ZA POTPISIVANJE SPORAZUMA O REALIZACIJI PROJEKTA UREĐENJA LOKALITETA REZERVOARA “SOUKBUNAR” SA OPĆINOM CENTAR SARAJEVO**

Zastupnici su smatrali da nema potrebe za uvodnim izlaganjem, obzirom da su dobili sve u materijalima, nije bilo pitanja niti diskusije, te je predsjedateljica po zaključivanju tačke pozvala na izjašnjavaње.

SKUPŠTINA JE JEDNOGLASNO (25 „ZA“) DONIJELA ODLUKU O DAVANJU SAGLASNOSTI KANTONALNOM JAVNOM KOMUNALNOM PREDUZEĆU “VODOVOD I KANALIZACIJA” D.O.O. SARAJEVO ZA POTPISIVANJE SPORAZUMA O REALIZACIJI PROJEKTA UREĐENJA LOKALITETA REZERVOARA “SOUKBUNAR” SA OPĆINOM CENTAR SARAJEVO.

**Deseta tačka dnevnog reda:**

**AD – 10.**

**PRIJEDLOG ODLUKE O IZMJENI NAZIVA JU OŠ "DOBROŠEVIĆI" SARAJEVO U NOVI NAZIV JU OŠ "MUSTAFA BUSULADŽIĆ" SARAJEVO**

Uvodno izlaganje je podnio ministar obrazovanja, nauke i mladih *Elvir Kazazović*.

U diskusiji su učestvovali zastupnici: *Eldar Čomor, Mario Vukasović, Safet Mešanović, Amar Dovadžija, Neira Dizdarević, Izudin Bajrović, Nermin Bjelak*.

Predsjedateljica je izjavila sumnju u glasanje, pa je PO Sekretar *Almira Kulovac Šetkić* provela pojedinačnu parozivku.

SKUPŠTINA NIJE (17 „ZA“) DONIJELA ODLUKE O IZMJENI NAZIVA JU OŠ "DOBROŠEVIĆI" SARAJEVO U NOVI NAZIV JU OŠ "MUSTAFA BUSULADŽIĆ" SARAJEVO.

Potom se prešlo na razradu 11. tačke dnevnog reda:

**AD-11.**

**PRIJEDLOG ODLUKE O IZMJENI BROJA ADRESE OSNOVNE ŠKOLE NA PODRUČJU OPĆINE ILIDŽA "MZ OSJEK“**

Zastupnici su Prijedlog odluke dobili u dopunskom materijalu.

Nije bilo pitanja niti diskusije, pa je predsjedateljica zaključila tačku i pozvala zastupnike na izjašnjavanje.

SKUPŠTINA JE JEDNOGLASNO (24 „ZA“) DONIJELA ODLUKU O IZMJENI BROJA ADRESE OSNOVNE ŠKOLE NA PODRUČJU OPĆINE ILIDŽA "MZ OSJEK“.

**Dvanaesta tačka dnevnog reda:**

**AD - 12.**

**PRIJEDLOG ODLUKE O PRIHVATANJU INFORMACIJE MINISTARSTVA ZA OBRAZOVANJE, NAUKU I MLADE KANTONA SARAJEVO O FINANSIJSKOM POSLOVANJU JAVNIH USTANOVA IZ OBLASTI PREDŠKOLSKOG, OSNOVNOG, SREDNJEG I VISOKOG OBRAZOVANJA I NAUKE ZA 2015. GODINU**

Zastupnici su materijale dobili uz poziv za sjednicu.

Ministar obrazovanja, nauke i mladih, *Elvir Kazazović*, je u ime Predlagača podnio uvodno izlaganje.

*Predsjedateljica* je uočila da u sali ima veoma mali broj zastupnika, te je u konsultaciji s Stručnom službom, konstatovala da ima kvorum i pozvala zastupnike na izjašnjavanje.

Isto je prekinula zastupnica *Sabina Ćudić* upozoravajući da određeni zastupnici vrijeđaju druge zastupnike, te tzahtijevala da predsjedateljica interveniše.

*Predsjedateljica* je zahvalila na informaciji, te zamolila zastupnicu da se završi glasanje po otvorenoj tački dnevnog reda, a potom razmotri navedena situacija.

SKUPŠTINA JE JEDNOGLASNO (22 „ZA“) DONIJELA ODLUKU O PRIHVATANJU INFORMACIJE MINISTARSTVA ZA OBRAZOVANJE, NAUKU I MLADE KANTONA SARAJEVO O FINANSIJSKOM POSLOVANJU JAVNIH USTANOVA IZ OBLASTI PREDŠKOLSKOG, OSNOVNOG, SREDNJEG I VISOKOG OBRAZOVANJA I NAUKE ZA 2015. GODINU.

**Četrnaesta tačka dnevnog reda:**

**AD – 14.**

**PRIJEDLOG ODLUKE O DOPUNI ODLUKE O IMENOVANJU ČLANOVA VIJEĆA NACIONALNIH MANJINA KANTONA SARAJEVO**

*Predsjedateljica* je napomenula da su zastupnici dobili materijal uz poziv za sjednicu.

*Ministar pravde i uprave Mario Nenadić* je podnio uvodno izlaganje.

*Predsjedateljica* je konstatovala da u sali nema dovoljno zastupnika za punovažan rad i odlučivanje, te je zaključila sjednicu u 16 sati i 12 minuta.

**Zapisnik izradila:**

Lejla Kadrić

**Po ovlaštenju**

**SEKRETAR**

**SKUPŠTINE KANTONA SARAJEVO**

Almira Kulovac Šetkić, dipl. pravnik

**PREDSJEDATELJICA**

**SKUPŠTINE KANTONA SARAJEVO**

Prof. Ana Babić

**ZAPISNIK SA  
NASTAVKA 19. RADNE SJEDNICE SKUPŠTINE KANTONA  
SARAJEVO, ODRŽANE 19.10.2016. GODINE SA POČETKOM RADA  
U 10,00 SATI**

**Sarajevo, oktobar 2016. godine**

**Sjednici su prisustvovali poslanici/zastupnici:**

**STRANKA DEMOKRATSKE AKCIJE**

1. Ademović Kemal
2. Delalić Sabahudin
3. Čelik Mirza
4. Čomor Eldar
5. Dovadžija Amar
6. Kozadra Muhamed
7. Mašović Amor
8. Mešanović Safet
9. Okerić Elmedin
10. Prevljak Fikret

**DEMOKRATSKA FRONTA – ŽELJKO KOMŠIĆ**

1. Dizdarević Neira
2. Kerla Bibija
3. Mario Vukasović

**SAVEZ ZA BOLJU BUDUĆNOST – FAHRUDIN RADONČIĆ**

1. Babić Ana
2. Bajrović Izudin
3. Lakota Rasim
4. Marić Zvonko
5. Rađo Dževad

**SOCIJALDEMOKRATSKA PARTIJA BOSNE I HERCEGOVINE**

1. Segmedina Bajramović Srna
2. Šućur Slaviša

**NAŠA STRANKA**

1. Čudić Sabina
2. Forto Edin
3. Kojović Predrag

**BOSANSKA STRANKA – MIRNES AJANOVIĆ**

1. Pleho Haris
2. Rasim Smajić

**BOSANSKOHERCEGOVAČKA PATRIOTSKA STRANKA – SEFER HALILOVIĆ**

1. Semir Halilović

**SAMOSTALNI POSLANICI/ZASTUPNICI**

1. Bjelak Nermin
2. Aljović Hamed
3. Mekić Amel
4. Pecikoza Fahrudin
5. Akšamija Goran
6. Bukva Sejo
7. Mehmedagić Mersiha
8. Pindžo Mirsad



## **TOK SJEDNICE**

Nastavak 19. Radne sjednice Skupštine Kantona Sarajevo otvorila je *predsjedateljica Ana Babić (u daljem tekstu Predsjedateljica)* dana 19. oktobra, 2016.godine u 10,00 sati.

Prema evidenciji Službe sjednici je na otvaranju prisustvovalo 26 zastupnika, što je dovoljan broj za punovažan rad i odlučivanje, a svoj izostanak pravdala je zastupnica: *Selma Filipović*.

*Predsjedateljica* je napomenula zastupnike da se na prethodnom zasjedanju obradilo trinaest tačaka Dnevnog reda, te da su preostale sljedeće tačke:

14. Prijedlog odluke o dopuni Odluke o imenovanju članova Vijeća nacionalnih manjina Kantona Sarajevo;
15. Izvještaj o radu i finansijskom poslovanju Zavoda za izgradnju Kantona Sarajevo, za 2015. godinu;
17. Izvještaj Ekspertne komisije Ministarstva za obrazovanje, nauku i mlade Kantona Sarajevo za davanje stručnog/ekspertnog mišljenja o opravdanosti osnivanja Odsjeka za edukaciju i rehabilitaciju na Pedagoškom fakultetu Univerziteta u Sarajevu
18. Informacija o stepenu realizacije skupštinskih zaključaka za čiju je realizaciju zadužena Vlada Kantona Sarajevo.

Potom je *predsjedateljica* prešla na realizaciju navedenih tačaka dnevnog reda.

### **Četrnaesta tačka dnevnog reda:**

#### **AD – 14.**

### **PRIJEDLOG ODLUKE O DOPUNI ODLUKE O IMENOVANJU ČLANOVA VIJEĆA NACIONALNIH MANJINA KANTONA SARAJEVO**

Prijedlog odluke su zastupnici dobili uz poziv za sjednicu. *Ministar pravde i uprave Mario Nenadić* je podnio uvodno izlaganje.

Nije bilo prijavljenih zastupnika za pitanja ili diskusiju pa je *predsjedateljica* pozvala na izjašnjavanje.

SKUPŠTINA JE JEDNOGLASNO (28 „ZA“) DONIJELA ODLUKU O DOPUNI ODLUKE O IMENOVANJU ČLANOVA VIJEĆA NACIONALNIH MANJINA KANTONA SARAJEVO.

### **Petnaesta tačka dnevnog reda:**

#### **AD – 15.**

### **IZVJEŠTAJ O RADU I FINANSIJSKOM POSLOVANJU ZAVODA ZA IZGRADNJU KANTONA SARAJEVO ZA 2015. GODINU**

*Predsjedateljica* je naglasila da su zastupnici dobili Izvještaj uz poziv za sjednicu, te je pozvala predstavnika Predlagača da podnese uvodne.

U ime Predlagača obratio se *Dragan Ivanović*, pomoćnik direktorice Zavoda za izgradnju Kantona Sarajevo.

Kako nije bilo prijavljenih za pitanja ili diskusiju *predsjedateljica* je pozvala zastupnike na izjašnjavanje.

**SKUPŠTINA NIJE USVOJILA (8 „ZA“) IZVJEŠTAJ O RADU I FINANSIJSKOM POSLOVANJU ZAVODA ZA IZGRADNJU KANTONA SARAJEVO ZA 2015. GODINU.**

### **Šesnaesta tačka dnevnog reda:**

#### **AD-16.**

**IZVJEŠTAJ EKSPERTNE KOMISIJE MINISTARSTVA ZA OBRAZOVANJE, NAUKU I MLADE KANTONA SARAJEVO ZA DAVANJE STRUČNOG/EKSPERTNOG MIŠLJENJA O OPRAVDANOSTI OSNIVANJA ODSJEKA ZA EDUKACIJU I REHABILITACIJU NA PEDAGOŠKOM FAKULTETU UNIVERZITETA U SARAJEVU**

*Predsjedateljica* je konstatovala da su zastupnici dobili materijal uz poziv za sjednicu, te pozvala predstavnika Predlagača da podnese uvodne napomene.

*Pomoćnik ministra za visoko obrazovanje, Sifet Kukuruz*, podnio je uvodno izlaganje u ime Predlagača.

U diskusiji, koja je potom uslijedila, učestvovala je zastupnik *Eldar Čomor*.

Po zaključivanju diskusije, *predsjedateljica* je pozvala zastupnike na izjašnjavanje.

**SKUPŠTINA JE JEDNOGLASNO USVOJILA IZVJEŠTAJ EKSPERTNE KOMISIJE MINISTARSTVA ZA OBRAZOVANJE, NAUKU I MLADE KANTONA SARAJEVO ZA DAVANJE STRUČNOG/EKSPERTNOG MIŠLJENJA O OPRAVDANOSTI OSNIVANJA ODSJEKA ZA EDUKACIJU I REHABILITACIJU NA PEDAGOŠKOM FAKULTETU UNIVERZITETA U SARAJEVU.**

### **Osamnaesta tačka dnevnog reda:**

#### **AD – 18.**

**INFORMACIJA O STEPENU REALIZACIJE SKUPŠTINSKIH ZAKLJUČAKA ZA ČIJU JE REALIZACIJU ZADUŽENA VLADA KANTONA SARAJEVO**

*Predsjedateljica* je naglasila da je na prijedlog zastupnice *Mersihe Mehmedagić*, Skupština je donijela Zaključak da se ova tačka uvrsti na svaku redovnu sjednicu Skupštine, a Kolegij je zauzeo stav da se ona uvijek razmatra kao posljednja tačka dnevnog reda, te je u skladu s tim izvijestila zastupnike da za ovu sjednicu nije pristiglo informacija o realizaciji skupštinskih zaključaka.

*Predsjedateljica* je zaključila nastavak 19. Radne sjednice Skupštine Kantona Sarajevo u 10 sati i 47 minuta.

**Zapisnik izradila:**

Lejla Kadrić

**Po ovlaštenju**

**SEKRETAR**

**SKUPŠTINE KANTONA SARAJEVO**

Almira Kulovac Šetkić, dipl. pravnik

**PREDSJEDATELJICA**

**SKUPŠTINE KANTONA SARAJEVO**

Prof. Ana Babić